

# 救亡歌\*

吴征镒

\* 作于 1931 年“九·一八”事变发生后五日内，时年十五岁。

九月十九日方明，天外忽来霹雳声，驻沈日军肆强暴，藉口攻我北大营。我军时方梦中醒，曳兵而走狼狈形。云是奉命不抵抗，即速退后不计程。全军方震恐，惟闻声隆隆。一炮空中来，迫击炮厂倾。一炮倏又至，血肉竞飞红。惟闻惨呼急，惟见惨雾浓。倭寇雄心犹未尽，更占长春吉林宽城子。派兵占领谁敢违，唾手而得乐如此！茅庐瓦屋比户烧，童妇男儿尽诛洗。奸淫掳掠诸兽行，发泄无遗谁可弭！缴械之兵与警察，炮声一到骈头死。我来杀汝不抵抗，只有强权无公理。尸堆成山血如水，不抵抗者亦如此！虽使杀人如蝼蚁，我护日侨不得已！

噩耗传来自东北，闻者伤心皆一哭！彼为刀俎我鱼肉，焉能不加反抗听诛戮！揭竿一呼聚者百，共议抗日而救国。挫其齿，裂其目。彼能覆，我能复。斯我中华之土服，焉能令彼暴日作鹿逐！可忍此辱，国将不国！请求前线休退缩，一身犹当数矢簇。

我闻斯耗泪数行！国人惟有内战长。廿年改革图自强。迫击之炮机关枪。即如东北张学良，养兵数年精且强。一举曹吴胆俱丧，再举幽并归土疆，三举石逆失猖狂。人莫不畏公之锋芒。倭寇虽猛如豺狼，公竟不作一坚墙。昔日之行亦何刚？今日之血亦何凉？又如赫赫之中央，征诛讨伐神威扬，初覆李白再冯唐，南征讨赤势更张，声威所播世无双，今日对敌心彷徨。

吁嗟呼！国亡亦已久，日维饰太平。南北争意气，东西谈纵横。战争犹不止，如何敌强邻？夺利休言义，争权不用情，内心不团结，如何敌强邻？学术多守旧，服用乃维新，科学不发达，如何敌强邻？水利多腐败，农业不经营，地不尽其利，如何敌强邻？政府皆冗员，市井尽游民；人不尽其才，如何敌强邻？体格多不健，军事鲜能精；不能致康强，如何敌强邻？人格多堕落，道义不能行；日维贪私欲，如何敌强邻？吾愿全国人，如闻警钟声，春梦争先觉，始得庆更生。国亡同为奴，富贵焉足争。各尽其天职，莫为袖手人。从今百改革，首要惟革心。亟宜大团结，阍墙不用争。亟宜大勤奋，科学以昌明。亟宜倡农业，国富财以生。亟宜兴工业，得用诸游民。亟宜倡体育，民权始可臻。亟宜倡道德，莫贻害其群。凡事须实践，莫沽虚伪名。一心惟对日，誓如白水深。与之绝来往，誓如高山陵。国耻庶可雪，方为中国民。

歌毕声嘶力欲竭，惟愿全国皆努力！必欲此耻一旦雪，莫作五分钟之热！

（刊于 1931 年 9 月扬州中学校刊“文艺”）